

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
OCT 10 1952

10

東坡全集

T 5345/1381

十

東坡全集第一十九卷

西蜀後學張養正校正

聶紹昌編刻

次韻劉景文西湖席上

二老長身屹兩峰。常撞大呂應黃鍾。將辭鄴下劉公幹。却見雲間陸士龍。白髮憐君略相似。青山許我定相從。吾今官已六百石。慙愧當年邴曼容。

次前韻荅馬忠王

坡陀巨麓起連峰。積累當年慶自鍾。靈運子孫俱得鳳。慈明兄弟孰非龍。河梁會作看雲別。詩社何妨載酒從。祇有西湖似西子。故應宛轉爲君容。

哈佛大學漢和
圖書館珍藏印

予去杭十六年而復來留二年而去平生自
覺出處老少粗似樂天雖才名相遠而安分
寡求亦庶幾焉三月六日來別南北山諸道
人而下天竺惠淨師以醜石贈行作三絕句
當年衫鬢兩青青強說重臨慰別情衰髮祇今無
可白故應相對話來生
出處依稀似樂天敢將衰朽較前賢便從洛社休
官去猶有閑居二十年
在郡依前六百日山中不記幾回來還將天竺一
峯去欲把雲根到處栽

次韻答黃安中無簡林子中

老去心灰不復然一麾江海意方堅那堪黃散付
子度空羨杭蘇養樂天病肺一春難白酒別腸三
夜遶朱絃群仙政欲吾歸去共把清風借玉川

留別蹇道士拱辰

黑月在濁水何曾不清明寸田滿荆棘梨棗無從
生何時及吾真歲月今崢嶸屢接方外士早知俗
緣輕庚桑託雞鵠未肯化南榮晚識此道師似有
宿世情笑指北山雲訶我不歸耕仙人漢陰馬微
服方地行咫尺不往見煩子通姓名願持空手去

東坡全集 卷之二十九
獨控橫江鯨

次韻子由書王晉卿畫山水二首

老去君空見畫夢中我亦曾遊桃花縱落誰見水
到人間伏流

山人昔與雲俱出俗駕今隨水不回賴我胸中有
佳處一樽時對畫圖開

又書王晉卿畫四首

山陰陳迹

當年不識此清真強把先生擬季倫等是人間一
陳迹聚蚊金谷本何人

雪谿乘興

谿山雪月兩佳哉賓主談鋒夜轉雷猶言不見戴
安道爲問適從何處來

四明狂客

毫端偶集一微塵何處谿山非此身狂客思歸便
歸去更求救賜枉天真

西塞風雨

斜風細雨到來時我本無家何處歸仰看雲天真
筍笠旋收江海入蓑衣

破琴詩

并引

東坡全集 卷之二十九
舊說房瑄開元中嘗宰盧氏與道士邢和璞出游過夏口村入廢佛寺坐古松下和璞使人鑿地得甕中所藏婁師德與永禪師書笑謂瑄曰頗憶此耶瑄因悵然悟前生之爲永師也故人柳子王寶此畫云是唐本宋復古所臨者元祐六年三月十九日予自杭州還朝宿吳松江夢長老仲殊挾琴過予彈之有異聲就視琴頗損而有十三絃予方歎惜不已殊曰雖損尚可修曰柰十三絃何殊不荅誦詩云度數形名本偶然破琴今有十三絃此生若遇邢和璞方信秦箏是響泉予夢中了然識

其所謂既覺而忘之明日晝寢復夢殊來理前語再誦其詩方驚覺而殊適至意其非夢也問之殊蓋不知是歲六月見子王之子子文于京師求得其畫乃作詩并書所夢其上子王名瑾善作詩及行草書復古名廸畫山水草木蓋妙絕一時仲殊本書生棄家學佛通脫無所着皆竒士也

破琴雖未修中有琴意足誰云十三絃音節如佩玉新琴空高張絲聲不附木宛然七絃箏動與世好逐陋矣房次律因循墮流俗懸知董庭蘭不識無絃曲

題王晉卿畫後

醜石半蹲山下虎長松倒卧水中龍試君眼力看
多少數到雲峯第幾重

聽武道士彈賀若

清風終日自開簾涼月今宵肯挂簷琴裏若能知
賀若詩中定合愛陶潛

元祐六年六月自杭州召還汶公館我於東

堂閣舊六卷次諸公韻三首

半熟黃梁日未斜科王堂陰合手栽花却尋三十年
前味未飯鐘聲已飯茶

夢覺還驚屨響廊故人來炷影前香鬢鬚白盡成

何事一帖空存老遂良

法帖中有褚遂良書云
即日遂良鬚髮盡白

尺一東來喚我歸衰年已迫故山期文章曹植今

堪笑却卷波瀾入小詩

次韻子由書王晉卿畫山水一首而晉卿和

二首

誤點故教同子敬雜篇真欲擬湯休壠雲寄我山

中信雪月追君溪上舟會看飛仙虎頭篋却來顛

倒拾遺裘

子美詩云天吳與
紫鳳顛倒在短褐

王孫辨作玄真子細

雨斜風不濕鷗

此境眼前聊妄想幾人林下是真休我今心似一
潭月君已身如萬斛舟看畫題詩雙鶴鬢歸田送
老一羊裘明年無與士龍去萬頃蒼波沒兩鷗

感舊詩 并引

嘉祐中予與子由同舉制策寓居懷遠驛時年二
十六而子由二十三耳一日秋風起雨作中夜條
然始有感槩離合之意自爾宦游四方不相見者
十常七八每夏秋之交風雨作木落草衰輒悽然
有此感蓋三十年矣元豐中謫居黃岡而子由亦
貶筠州嘗作詩以記其事元祐六年予自杭州召

還寓居子由東府數月復出領汝陰時予年五十
六矣乃作詩留別子由而去

床頭枕馳道雙闕夜未央車轂鳴枕中客夢安得
長新秋入梧葉風雨驚洞房獨行慚月影悵焉感
初涼筮仕記懷遠謫居念黃岡一往三十年此懷
未始忘扣門呼阿同 子由一字同叔 安寢已太康青山映

華髮歸計三月糧我欲自汝陰徑上潼江章想見

冰槃中石蜜與柿霜 予欲請東川而歸憐子遇明
二物皆東川所出

主憂患已再嘗報國何時畢我心久已降

西湖秋涸東池魚窘甚因會客呼網師遷之

東坡全集 卷之五十一
西池爲一笑之樂夜歸被酒不能寐戲作放
魚一首

東池浮萍半粘塊裂碧跳青出魚背西池秋水尚
涵空舞閣搖深吹荇帶吾僚有意爲遷居老守縱
饒那忍膾縱橫爭看銀刀出澆滷初驚玉花碎但
愁數罟損鱗鬣未信長堤隔濤瀨滅滅發發須臾
閒圍圍洋洋尋丈外安知中無蛟龍種尚恐或有
風雲會明年春水漲西湖好去相忘渺淮海

復次放魚前韻荅趙承議陳教授

擾擾萬生同大塊捨榆不羨培風背青丘已吞雲

夢芥黃河復繚天門帶長譏韓子隘且陋一飽鯨
魚何足膾東坡也是可憐人披挾泥沙收細碎逝
將歸休八節灘又欲往釣七里瀨正似此魚逃網
中未與造物遊數外且將新句調二子湖上秋高
風月會爲君更喚木腸兒脚扣兩舷歌小晦

九月十五日觀月聽琴西湖一首示坐客

白露下衆草碧空卷微雲孤光爲誰來似爲我與
君水天浮四坐河漢落酒樽使我冰雪腸不受麪
蘖醺尚恨琴有絃出魚亂湖紋哀彈本舊曲妙耳
非昔聞良時失俯仰此見寧朝昏懸知一生中道

眼無由渾

復次前韻謝趙景貺陳履常見和兼簡歐叔
弼兄弟

能詩李長吉識字楊子雲端能居此府坐歎獲兩
君誓將江湖去浮我五石樽眷焉復少留尚爲世
所醺或勸莫作詩兒輩工織紋朱絃寄三歎未害
俗耳聞共尋兩歐陽伐薪照黃昏是家有井汲
多終不渾

送歐陽主簿赴官韋城四首

鳳雛驥子日相高白髮蒼顏笑我曹讀遍牙籤三

萬軸却來小邑試牛刀

出處年來恨不齊一樽臨水記分携江湖咫尺吾
將老汝穎東流子却西

白馬津頭春水來白魚猶喜似江淮使君已復冰
堂酒更勸重新畫舫齋

道傍垂白定沾巾正似當年綠髮新故國依然喬
木在典刑復見老成人

泛穎

我性喜臨水得穎意甚奇到官十日來九日河之
湄吏民笑相語使君老而癡使君實不癡流水有

令姿遶郡十餘里不駛亦不遲上流直而清下流
 曲而漪畫船俯明鏡笑問汝為誰忽然生鱗甲亂
 我鬚與眉散為百東坡頃刻復在茲此豈水薄相
 與我相娛嬉聲色與臭味顛倒眩小兒等是兒戲
 物水中少磷緇趙陳兩歐陽同叅天人師觀妙各
 有得共賦泛穎詩

六觀堂老人草書詩

物生有象象乃滋夢幻無根成斯須方其夢時了
 非無泡影一失俯仰殊清露未晞電已徂此滅滅
 盡乃真吾云如死灰實不枯逢場作戲三昧俱化

身為鑿忘其軀草書非學聊自娛落筆已喚周越

奴蒼鼠奮髯飲松腴剡藤玉板開雪膚遊龍天飛

萬人呼莫作羞澁羊氏姝六觀取金剛經夢幻等
六物也老人惜了性精

於醫而善草書下筆有遠
韻而人莫知貴故作此詩

次韻劉景文見寄

淮上東來雙鯉魚巧將書信渡江湖細看落墨皆
 松瘦想見掀髯正鶴孤烈士家風安用此書生習
 氣未能無莫因老驥思千里醉後哀歌缺唾壺

次韻趙景貺督兩歐陽詩破陳酒戒

商也哀未散歲月忽已秋祥琴雖未調餘悲不敢

留矧此乃韻語未入金石流羲之生五之總角出
銀鈎吾家有二許下筆兩不休君言不能詩此語
人信不千鍾斯爲堯百榼斯爲丘陋矣陶士衡當
以太白浮酒中那有失醉則不驚鷗明當罰二子
已洗兩玉舟

叔弼云履常不飲故不作詩勸履常飲

我本畏酒人臨觴未嘗訴平生坐詩窮得句恐不
吐吐酒茹好詩肝胃生滓汗用此較得喪天豈不
足付吾儕非二物歲月誰與度悄焉得長愁爲計
已大誤二歐非無詩恨子不飲故強爲釀一酌將

非作愁具成言如皎日援筆當自賦他年五君詠
山王一時數

臂痛謁告作三絕句示四君子

公退清閑如致仕酒餘歡適似還鄉不妨更有安
心病卧看縈簾一炷香

心有何求遣病安年來古井不生瀾祗愁戲瓦閑
童子却作泠泠一水看

小閣低窓卧晏温了然非默亦非言維摩示病吾
真病誰識東坡不二門

到穎未幾公帑已竭齋厨索然戲作數句

我昔在東武吏方謹新書齋空不知春客至先愁
 予采杞聊自誑食菊不敢餘歲月今幾何齒髮日
 向踈幸此一郡老依然十年初夢飲本來空真飽
 竟亦虛尚有赤脚婢能烹頰尾魚心知皆夢耳慎
 勿歌歸歎

景貺履常屢有詩督叔弼季默唱和已許諾
 矣復以此句挑之

君家文律冠西京旋築詩壇按酒兵袖手莫輕真
 將種致師須得老門生明朝鄭伯降誰受昨夜條
 侯壁已驚從此醉翁天下樂還應一舉百觴傾文忠

分贈蘇梅詩云我亦願助勇鼓旗
 謀其旁快哉天下樂一酌宜百觴

贈月長老

天形倚一笠地水轉兩輪五霸之所連毫端栖一
 塵功名半幅紙兒女浪苦辛子有折足鐺中容五
 合陳十年此中過却是英特人延我地爐坐語軟
 意甚真白灰如積雪中有紅麒麟勿觸紅麒麟作
 灰維那瞋拱手但默坐墻壁方諄諄今宵恨客多
 汙子白氎巾後夜當獨來不煩主與賓蒲團坐紙
 帳自要觀我身

次韻荅錢穆父以軾得汝陰用杭越唱酌韻

作詩見寄

大耿疲勞已離群。小馮慈愛且當門。軾本以舍弟親憐請郡

王堂不著扶犁手。霜髮偏宜畫鹿幡。豪傑雖無兩

玉繼。子直深父風流猶有二歐存。叔弼季默清詩已入新歌

舞。要使邦人識雅言。

韓退之孟郊墓銘云以昌其詩舉此問王定

國當昌其身耶昌其詩也來詩下語未契作

此荅之

昌身如飽腹飽盡還當饑昌詩如膏面為人作容
姿不如昌其氣鬱鬱老不衰雖云老不衰劫壤安

所之不如昌其志志一氣自隨養之塞天地孟軻
不吾欺人言魏勃勇股栗向小兒何如魯連子談
笑却秦師慎勿怨謗讒乃我得道資淤泥生蓮華
糞壤出菌芝賴此善知識使我枯生萑吾言豈須
多冷暖子自知

送歐陽推官赴華州監酒

我觀文忠公四子皆超越仲也珠徑寸照夜光如

月好詩真脫兔下筆先落鶻知音如周郎議論亦

英發文章乃餘事學道探玄窟死為長白主名字

書絳闕

熙寧之末仲純父見僕於京城之東曰吾
夢道士持告身授吾曰上帝命汝為長白

山主此何祥也傷心清潁尾已伴白鷗沒喜見三
明年仲純父沒少年俱有千里骨千里不難到莫遣歷塊蹶臨分
出苦語願子書之笏

十月十四日以病在告獨酌

翠柏不知秋空庭失搖落幽人得佳蔭露坐方獨
酌月華稍澄穆霧氣尤清薄小兒亦何知相語翁
正樂銅爐燒柏子石鼎煮山藥一盃賞月露萬象
紛醅酢此生獨何幸風纜欣初泊逝逃顏蹶網行
赴松喬約莫嫌風有待漫欲戲寥廓冷然心境空
髣髴來笙鶴

獨酌試藥玉酒琰有懷諸君子明日望夜月
庭佳景不可失作詩招之

鎔鈇煮白石作玉真自欺琢削爲酒盃規摹定州
瓷荷心雖淺狹鏡面良渺瀰持此壽佳客到手不
容辭曹侯天下平定國豈其師一飲至數石温克
頗似之風流越王孫詩酒屢出奇喜我有此客王
盃不徒施請君詰歐陳問疾來何遲呼兒掃月榭
扶病及良時

歐季默以油煙墨二丸見餉各長寸許戲作

小詞

東坡全集 卷之十一
書窓拾輕煤佛帳掃餘馥辛勤破千夜收此一寸
玉癡人畏老死腐朽同草木欲將東山松湮盡南
山竹墨堅人苦脆未用歎不足且當注蟲魚莫草
三千牘

明日復以大魚爲餽重二十斤且求詩故復
戲之

漢庭九尺人誰似老方朔那將一寸金令足三冬
學餉魚欲自洗鱗尾光卓犖我是騎鯨手聊堪充
鹿角

和趙景貺栽檜

汝陰多老檜處處屯蒼雲地連丹砂井物化青牛
君時有再生枝穎之靈壇觀亦有再生檜還作左紐紋王孫有
古意書室延清芬應憐四孺子不墮凡木群體備
松柏姿氣含芝朮薰初扶鶴立骨未出龍纏筋巢
根白蟻亂網葉秋蟲紛乃知蔽芾初甚要封植勤
他年皮三寸狐鼠了不聞

葉待制求先墳求慕亭詩

靈區有異產化國無潜珍承平百年間簪纓半齊
民建溪富竒偉葉氏初隱淪森然見喬木其下維
德人佳哉鬱葱葱氣若鳳與麟聯翩出儒將豈惟

東坡全集 卷之二十一
十朱輪新松無鹿觸舊柏有烏馴待公歸上冢淚
葉乃肯春

與趙陳同過歐陽叔弼新治小齋戲作

江湖渺故國風雨傾舊廬東來三十年愧此一束
書尺椽亦何有而我常客居羨君開此室容膝真
有餘拊床琴動搖弄筆窓明虛後夜龍作雨天明
雪填渠時方禱雨龍祠作此句時星斗
燦然四更風雨大至明日乃雪夢回聞剝
啄誰乎趙陳予添丁走沽酒通德起挽蔬主孟當
啗我王鱗金尾魚一醉忘其家此身自遽除

聚星堂雪 并敘

元祐六年十一月一日禱雨張龍公得小雪與客
會飲聚星堂忽憶歐陽文忠公作守時雪中約客
賦詩禁體物語於艱難中特出奇麗爾來四十餘
年莫有繼者僕以老門生繼公後雖不足追配先
生而賓客之美殆不減當時公之二子又適在郡
故輒舉前令各賦一篇以為汝南故事云

窓前暗響鳴枯葉龍公試手行初雪映空先集疑
有無作態斜飛正愁絕衆賓起舞風竹亂老守先
醉霜松折恨無翠袖點橫斜祇有微燈照明滅歸
來尚喜更鼓未晨起不待鈴索掣未嫌長夜作衣

東坡全集 卷之二十九
稜却怕初陽生眼纈欲浮大白追餘賞幸有回颺
驚落屑模糊檜頂獨多時歷亂瓦溝裁一瞥汝南
先賢有故事醉翁詩話誰續說當時號令君聽取
百戰不許持寸鐵

歐陽叔弼見訪誦陶淵明事歎其絕識叔弼
既去感槩不已而賦此詩

淵明求縣令本緣食不足束帶向督郵小屈未爲
辱翻然賦歸去豈不念窮獨重以五斗米折腰營
口腹云何元相國萬鍾不滿欲胡椒銖兩多安用
八百斛以此殺其身何翅抵鵲王往者不可悔吾

其反自燭

喜劉景文至

天明小兒更傳呼髯劉已到城南隅尺書真是髯
手迹起坐熨眼知有無今人不作古人事今世有
此古丈夫我聞其來喜欲舞病自能起不用扶江
淮旱久塵土惡朝來清雨濯鬢鬚相看握手了無
事千里一笑無乃迂平主所樂在吳會老死欲葬
杭與蘇過江西來二百日冷落山水愁吳姝新堤
舊井各無恙參寥六一豈念吾別後新詩巧摹寫
袖中知有錢塘湖

東坡全集 卷之五
禱雨龍公既應劉景文有詩次韻

張公晚爲龍抑自龍中來伊昔風雲會咄嗟潭洞
開精誠苟可貫賓主真相陪洞簫振羽舞白酒浮
雲壘言從關洲妃遠去焦氏臺倒傾瓶中雨一洗
麥上埃破旱不論功乘雲却空回嗟龍與我輩用
意豈遠哉使君秉仁義英風冠東萊笑說龍爲友
幽明莫相猜

劉景文家藏樂天身心問荅三首戲書一絕
其後

淵明形神自我樂天身心相物而今月下三人他

日當成幾佛

西湖戲作

一士千金未易償我從陳趙兩歐陽舉鞭拍手笑
山簡祇有并兒一葛強

送歐陽季默赴闕

先生豈止一懷祖郎君不減王文度膝上幾日今
白鬚令我眼中見此父汝南相從三晦朔君去苦
早我來暮霜風淒緊正脫木穎水清淺可立鷺莫
辭白酒瀉香泉已覺扁舟掠新渡坐看士衡執別
手更遣夢得出竒句郎君可是筦庫人乃使驥駟

隨蹇步置之行矣無足道賢愚豈在遇不遇

用前韻作雪詩留景文

萬松嶺上黃千葉載酒年年踏松雪劉郎去後誰
復來花下有人心斷絕東齋夜坐搜雪句兩手龜
拆霜須折無情豈亦畏嘲弄穿簾入戶吹燈滅紛
紛兒女爭所似碧海長鯨君未掣朝來雲漢接天
流顧我小詩如點纈歐陽趙陳在戶外急掃中庭
鋪木屑交遊雖似雪柏堅聚散行作風花瞥晴光
融作一尺泥歸有何事真無說泥乾路穩放君去
莫倚馬蹄如踏鐵

和劉景文見贈

元龍本志陋曹吳豪氣崢嶸老不除失路今爲噲
等伍作詩猶似建安初西來爲我風鰲面獨卧無
人雪縞廬留子非爲十日飲要令安世誦亡書

和劉景文雪

占雨又得雪龜寧欺我哉似知吾輩喜故及醉中
來童子愁冰硯佳人苦膠盃那堪李常侍入蔡夜
銜枚

次前韻送劉景文

白雲在天不可呼明月豈肯留庭隅怪君西行入

百里清坐十日一事無路人不識呼尚書但見凜

凜雄千夫君一馬兩僕率然相訪逆旅豈知入骨

愛詩酒醉倒正欲蛾眉扶一篇向人寫肝肺四海

知我霜鬢鬚君前有詩見寄云四海共知歐陽趙

陳皆我有豈謂夫子駕復迂爾來又見三黜柳共

此暖熱餐瓊蘇酒殺酸薄紅粉暗祗有穎水清而

姝一朝寂寞風雨散對影誰念月與吾郡中日與

趙景貺陳履常相從而景文復至不數日柳戒之

亦見過賓客之盛頃所未有然不數日叔弼景文

戒之旨何時歸帆沂江水春酒一變其棠湖景文

居九江近其棠湖

以屏山贈歐陽叔弼

漫郎天骨清生與世俗異學道新有得為貧聊復

仕每於紅塵中常起青霞志屏山輟贈子莫遣汗

簪珥寓目紫翠間安眠本非睡夢中化為鶴飛入

長松寺

新渡寺席上次趙景貺陳履常韻送歐陽叔

弼比來諸君唱和叔弼但袖手旁睨而已臨

別忽出一篇頗有淵明風製坐皆驚歎

神屠不目全妙頰惟粧半更刀乃族庖倚市必醜

悍平生魏公籌忽斲郢人墁詩書亦何用遠道須

東坡全集卷二十九
此館多言雖數窮微中或排難子詩如清風寥寥
發將旦胡爲久閉匿綺語真自患許時笑我癡隔
屋相味歎竟識彥道否絕叫呼百萬清朝固多士
入門子皆冠莫言清潁水從此隔河漢異時我獨
來得魚楊柳貫持歸不忍食尺素解悽斷中有清
圓句銅丸飛柘彈春愁結凌漸正待一笑泮百篇
儻寄我呻吟吟鄭人緩

東坡全集第一十九卷終

東坡全集第二十卷

西蜀後學張養正校正

聶紹昌編刻

次韻趙景貺春思且懷吳越山水

歲華來無窮老眼久已靜春風如繫馬未動意先
騁西湖忽破碎鳥落魚動鏡縈城理枯瀆放聞起
膠艇願君營此樂宦事何時竟清河西湖三
閘督君成之思吳
信偶然出處付前定飄然不繫舟乘此無盡興醉
翁行樂處草木皆可敬明朝游北渚急掃黃葉徑
白酒真到齊紅裙已放鄭酒尚有香泉一壺爲樂
全先生服不作樂也

次韻陳履常張公龍潭

經明宣城宰家此百尺瀾鄭翁不量力敢以非意
干玄黃雜兩戰絳青表雙蟠事見龍公碑烈氣斃強敵
仁心惻饑寒精誠禱必赴苟簡求亦難蕭條麥麩
枯浩蕩日月寬念子無吏責十日勤征鞍春蔬得
雨雪少助先生槃龍不憚往來而我獨宴安閉閣
默自責神交清夜闌

竹間亭小酌懷歐陽叔弼季默呈趙景貺陳
履常

歲暮自急景我閑方緩觴醉餘西湖晚步轉比渚
長地坐略少長意行無澗岡久知薺麥青稍喜榆

柳黃盎盎春欲動漱漱夜未央水天鷗鷺靜月露
松檜香撫景方婉婉懷人重淒涼豈無一老兵坐
念兩歐陽我意正麋鹿君才亦圭璋此會恐難久
此歡不可忘

臘梅一首贈趙景貺

天工點酥作梅花此有臘梅禪老家蜜蜂採花作
黃蠟取蠟爲花亦其物天工變化誰得知我亦見
嬉作小詩君不見萬松嶺上黃千葉玉葉檀心兩
竒絕醉中不覺度千山夜聞梅香失醉眠歸來却
夢尋花去夢裏花仙覓竒句此間風物屬詩人我

老不飲當付君君行適吳我適越笑指西湖作衣鉢

送王竦朝散赴闕

我家衡山公清而畏人知臧否不出口默識如著龜擢于拱把中云有驥騄姿胡爲三十載尚作窮苦詞丈夫不妄語未効此可疑揭來清潁上淚濕中郎詩怪我一年長而作十年衰同時幾人在豈敢怨白髭願言指松柏永與霜雪期

伯父爲衡州日與君相知

有送行詩

次韻致政張朝奉仍招晚飲

掃白非黃精輕身豈胡麻怪君仁而壽未覺生有涯曾經丹化米親授棗如瓜雲烝作霧楷火滅噤雨巴自此養鉛鼎無窮走河車至今許玉斧猶事萼綠華

張魯見水州何仙姑得藥餌之人疑其以此壽也故有丹化米萼綠華之句皆女仙事

我本三生人疇昔一念差前生或草聖習氣餘

驚蛇儒臞謝赤松佛縛慙丹霞時時一篇出擾擾四座譁清詩得可驚信美詞多夸回車入官府治具隨貧家萍虀與豆粥亦可成咄嗟

閻立本職貢圖

正觀之德來萬邦浩如滄海吞河江音容儉惺服

竒麗橫絕嶺海逾濤瀧玆禽瑰產爭牽扛名王解
辯却蓋幢粉本遺墨開明窓我喟而作心未降魏
徵封倫恨不雙

次韻王滁州見寄

斯人何似似春雨歌舞農夫怨行路君看求叔與
元之坎珂一生遭口語兩翁當年髮未絲王堂揮
翰手如飛教得滁人解吟詠至今里巷嘲輕肥君
家聯翩盡卿相獨來坐獻谿山上笑捐浮利一雞
肋多取清名幾熊掌丈夫自重貴難售兩翁今與
青山久後來太守更風流要伴前人作詩瘦我勸

承明苦求出到處遺蹤尋六一憑君試與問琅耶
許我來游莫難色

趙景貺以詩求東齋榜銘昨日聞都下寄酒
來戲和其韻求分一壺作潤筆也

王孫天麒麟眸子奧而徹囊空學愈富屋陋人更
傑我老書益益放筆落座爭掣欲求東齋銘要飲西
湖雪長餅分未到小硯乾欲裂不似淳于髡一石
要燭滅

洞庭春色 并引

安定郡王以黃柑釀酒謂之洞庭春色色香味三

絕以餉其猶子德麟德麟以飲予為作此詩醉後
信筆頗有沓拖風氣

二年洞庭秋香霧長嘆手今年洞庭春玉色疑非

酒賢王文字飲醉筆蛟蛇走既醉念君醒遠餉為

我壽餅開香浮座瑣凸光照牖方傾安仁醺潘岳

云披黃苞以授相莫遣公遠明皇食棋凡千餘

傾綠瓷以酌醺要當立名字未可問升斗

枰使者云中塗皆有道應呼釣詩鈎亦號掃愁帚君知蒲萄惡止是嫫姆

黝須君灑海盃澆我談天口

送路都曹 并引

乖崖公在蜀有錄曹叅軍老病廢事公責之曰胡

不歸明日叅軍求去且以詩留別其略曰秋光都

似宦情薄山色不如歸意濃公驚謝之曰吾過矣

同僚有詩人而吾不知因留而慰薦之予幼時聞

父老言恨不問其姓名今都曹路君以小疾求致

仕予誦此事由之不可乃採前人意作詩送之并

送趙德麟陳履常各賦一篇

積雪困桃李春心誰為容淮光釀山色先作歸意

濃我亦倦游者君恩繫踈慵欲留耿介士伴我衰

遲蹤吏課升斗積崎嶇等鈇舂那將露電身坐待

東坡全集 卷之二十一
收千鍾結髮空百載市人看先封誰能搔白首抱
關望夕烽子意亮已成我言寧復從恨無乖崖老
一洗芥蒂胸我田荆谿上伏臘亦粗供懷哉江南
路會作林下逢

次韻陳履常雪中

可憐擾擾雪中人饑飽終同寓一塵老檜作花真
強項凍鳶儲肉巧謀身忍寒吟咏君堪笑得煖謹
呼我未貧坐聽屐聲知有路擁裘來看玉梅春

二鮮于君以詩文見寄作詩爲謝

我懷元祐初珪璋滿清班維時南隆老奉使獨未

還迂叟向我言青齊歲方艱斯人乃德星遣出虛

危間

司馬溫公謂軾曰子駿福星也京東人困甚且令往彼

召用旣晚矣天

命良復慳一朝失老驥寂寞空帝閑至今清夜夢
枕衾有餘潛喜聞二三子結髮師閔顏高論傾河
漢清詩鳴珮環遙知三日雪積玉埋崧山誰念此
幽桂坐蒙榛與管故人在穎尾投詩清泠灣
次韻趙德麟雪中惜梅且餉柑酒三首

千花未分出梅餘遣雪摧殘計已踈卧聞點滴如
秋雨知是東風爲掃除

閨苑千葩映玉宸人間祇有此花新飛翼要欲先

桃李散作千林火迫春

蝶躑嬌黃不受鞿東風暗與色香歸
偶逢白墮爭春手遣入王孫玉笋飛

和陳傳道雪中觀燈

新年樂事歎何曾
閉閣燒香一病僧
未忍便傾澆別酒
且來同看照愁燈
穎魚躍處新亭近
湖雪消時畫舫升
祗恐樽前無此客
清詩還有士龍能

閱世亭詩贈任仲微

任公鎮西南嘗贈繞朝策
當時若盡用善陣無赫赫
赫淒涼十年後邪正久已白
却留封德彝天意眇

難測象賢真驥種
號訴甘百謫豈云報私讐
禍福指絡脉高才食舊德
但恐里門窄傷心千騎歸
贈印黃壤隔惟有亭前檜
閱世不改色千年與井在
記此王粲宅

新渡寺送任仲微

春陰欲落雪野氣方升雲
我游清潁尾想見翠被君
古來聚散地與子復言分
倦游安稅駕瘦田失歸耘
獨宿古寺中荒雞亂鳴群
送子以曉角幽幽醒時聞

送運判朱朝奉入蜀七首

藹藹青城雲娟娟峨眉月隨我西北來照我光不滅

我在塵土中白雲呼我歸我遊江湖上明月濕我衣

岷峨天一方雲月在我側謂是山中人相望了不隔

夢尋西南路默數長短亭似聞嘉陵江跳波吹錦屏

送君無一物清江飲君馬路穿慈竹林父老拜馬下

不用驚走藏使者我友生聽訟如家人細說爲汝評

若逢山中友問我歸何日爲話腰脚輕猶堪踏泉石

病中夜讀朱博士詩

病眼亂燈火細書數塵沙君詩如秋露淨我空中花
古語多妙寄可識不可誇巧笑在頰頰哀音餘
摻搗曾坑一掬春紫餅供千家懸知貴公子醉眼
無真茶崎嶇爛石上得此一寸芽緘封勿浪出湯
老客未嘉

趙德麟餞飲湖上舟中對月

老守惜春意主人留客情官餘閑日月湖上好清
明新火發茶乳溫風散粥餠酒闌紅杏闇日落大
堤平清夜除燈坐孤舟擘岸撐建君幘未墮對此
月猶橫

贈朱遜之

并引

元祐六年九月與朱遜之會議于穎或言洛人善
接花歲出新枝而菊品尤多遜之曰菊當以黃爲
正餘可鄙也昔叔向聞驪茂一言知其爲人予於
遜之亦云

黃花候秋節遠自夏小正坤裳有正色鞠衣亦令
名一從人僞勝遂與天力爭易性寓非族改顏隨
所令新奇旣易售粹駁宜相傾疾惡逢伯厚識真
似淵明君言我所印世論誰改評願君爲霜風一
掃紫與頰

和趙德麟送陳傳道

二陳旣妙士兩歐惟德人王孫乃龍種世有籥雲
鱗五君從我游傾寫出怪珍俗物敗人意茲游實
清醇邨知有聚散佳夢失欠伸我舟下清潁淮水
吹玉塵君行踏曉月踈木挂寸銀尚寄別後詩翦

刻淮南春

上巳日與二子迨過游塗山荆山記所見

此生終安歸還軫天下半榻來乘櫟廟復作微禹

歎昔自南河赴杭州過此蓋二十二年矣從祠及彼呱有啓廟像設偶

此粲謂塗山寺秦祖當侑坐謂伯翳夏郊亦薦裸有鯀廟可

憐淮海人尚記弧矢旦淮南人相傳禹以六月六日生是日數萬人會山上

雖傳記不載然相傳如此荆山碧相照楚水清可亂別人有餘

坑美石肖温瓚荆山下有卞氏採玉坑石色如玉不受鑱刻取出出下轉變色不復

温管龜泉木杪出牛乳石池漫龜泉在荆山下色白而甘真陸羽所謂石

池漫流者有石記云唐正元中隨白龜流出小兒強好古侍史笑流汗

歸時蝙蝠飛炬火記遠岸

淮上早發

澹月傾雲曉角哀小風吹水碧鱗開此生定向江

湖老默數淮中十往來

次韻徐仲車仲車耳聾

惡衣惡食詩愈好恰似霜松嘖春鳥蒼蠅莫亂遠

雞聲世上誰如公覺早八年看我走三州元豐八年予赴

登州元祐四年赴杭州今赴揚州皆見仲車月自當空水自流人間擾

擾真螻蟻應笑人呼作鬪牛

次韻林子中春日新堤書事見寄

東坡全集 卷之三
東都寄食似孤雲，僕被真成一宿賓。收得玉堂揮翰手，却爲淮月弄舟人。羨君湖上齋搖碧，笑我花時甌有塵。爲報年來殺風景，連江夢雨不知春。詩來

有芍藥春之句，楊州近歲率爲此會，用花十餘萬枝，吏緣爲奸，民極病之，故罷此會。

送陳伯脩察院赴闕

裕陵固天縱，筆有雲漢姿。嘗重連山象，不數秋風辭。龍騰與虎變，狸豹復何施。我窮真有數，文字乃見知。聞君射策日，妙語發疇咨。一日喧萬口，驚倒同舍兒。豈知二十年，道路猶遲遲。苦言如藥石，瞑眩終見思。屈信反覆手，獨於君可疑。四門方穆穆，行矣及此時。

送張嘉父長官

都城昔傾蓋，駿馬初服輶。再見江湖間，秋鷹已難講。于今三會合，每進不少留。豫章旣可惜，瑚璉誰當收。微官有民社，妙割無雞牛。歸來我益敬，器博用自周。百年子初筵，我已迫旅酬。但當記苦語，高節貫白頭。

軾在穎州與趙德麟同治西湖未成改揚州
三月十六日湖成德麟有詩見懷次韻

太山秋毫兩無窮，鉅細本出相形中。大千起滅一

塵裏未覺杭穎誰雌雄來詩云與我在錢塘拓湖

淶大堤士女爭昌丰六橋橫絕天漢上北山始與

南屏通忽驚二十五萬丈老葑席卷蒼雲空竭來

穎尾弄秋色一水縈帶昭靈宮坐思吳越不可到

借君月斧修腫臃二十四橋亦何有接此十頃玻

黎風雷塘水乾禾黍滿寶釵耕出餘鸞龍明年詩

客來弔古伴我霜夜號秋蟲德麟見約來揚寄居亦有意求楊倅

次韻趙德麟西湖新成見懷絕句

壺中春色謂洞庭春色也飲中仙騎鶴東來獨惘然猶有

趙陳同李郭不妨同泛過湖船

再次韻趙德麟新開西湖

使君不用山麴窮饑民自逃泥水中欲將百瀆起

凶歲免使磚石愁楊雄西湖雖小亦西子縈流作

態清而丰千夫餘力起三閘焦陂下與長淮通十

年憔悴塵土窟清瀾一洗啼痕空王孫本自有仙

骨平生宿衛明光宮一行作吏人不識正似雲月

初朦朧時臨此水照冰雪莫遣白髮生秋風定須

却致兩黃鵠新與上帝開濯龍湖成君歸侍帝側

燈花已綴釵頭蟲予以穎人苦飢奏乞留黃河夫萬人修境內溝洫詔許之因以

餘力浚治此湖

東坡全集 卷之二十一 三十四丁
到官病勸未嘗會客毛正仲惠茶乃以端午
小集石塔戲作一詩爲謝

我生亦何須一飽萬想滅胡爲設方丈養此膚寸
舌爾來又衰病過午食輒噎繆爲淮海帥每愧厨
傳缺爨無欲清人奉使免內熱空煩赤泥印遠致
紫玉玦爲君伐羔豚歌舞菰黍節禪窓麗午景蜀
井出冰雪坐客皆可人鼎噐手自絜金釵候湯眼
魚蟹亦應訣遂令色香味一日備三絕報君不虛
授知我非輟啜

雙石 并引

至揚州獲二石其一綠色岡巒迤邐有穴達于背
其一至白可鑿漬以盆水置几案間忽憶在潁州
日夢人請住一官府榜曰仇池覺而誦杜子美詩
曰萬古仇池穴潛通小有天乃戲作小詩爲僚友
一笑

夢時良是覺時非汲水埋盆故自癡但見玉峰橫
太白便從鳥道絕峨眉秋險欲作煙雲意曉日令
涵草木姿一點空明是何處老人真欲住仇池
次韻和晁無咎學士相迎

少年獨識晁新城閉門却掃卷旆旌胸中自有談

東坡全集 卷之二
天口坐却秦軍發墨守有子不為謀置錐虹霓吞
吐忘寒饑端如太史牛馬走嚴徐不敢連尻雕裴
回未用疑相待枉尺知君有家戒避人聊復去瀛
洲伴我真能老淮海夢中仇池千仞巖便欲攬我
青霞幘且須還家與婦計我本歸路連西南老人
飲酒無人佐獨看紅藥傾白墮每到平山憶醉翁
懸知他日君思我路旁小兒笑相逢齊歌萬事轉
頭空賴有風流賢別駕猶堪十里卷春風

次韻范淳父送秦少章

宿緣在江海世網如予何西來庾公塵已濯長淮

波十年淮海人初見一麥禾但欣爭訟少未覺舟

車多秦郎忽過我賦詩如卷阿句法本黃子

謂魯直也

二毫與措磨

其兄少游與張文潛

嗟我久離群逝將老西河

後生多名士欲薦空悲歌小范真可人獨肯勤收

羅瘦馬識馱耳枯桐得雲和近聞館李生

李薦病方叔

鶴借一柯贈行苦說我妙語慰嗟跚西羗已解仇

烽火連朝那坐籌付公等吾將寄潛沱

靈隱前一首贈唐林夫

靈隱前天竺後兩澗春淙一靈鷲不知水從何處
來跳波赴壑如奔雷無情有意兩莫測肯向冷泉

亭下相縈回我在錢塘六百日山中暫來不暖席
今君欲作靈隱居葛衣草屨隨僧蔬能與冷泉作
主一百日不用二十四考書中書

滕達道挽詞二首

先帝知公早虛懷第一人至今詩禮將惟數武宣
臣材大雖難用時來亦少信高平風烈在威敏典
刑新公少受知於范帝文孫元晧空試乘邊策寧留相漢身淒
涼舊部曲淚濕塚前麟

雲夢連江雨樊山落木秋公方占賈鵬我正買龔
牛共有江湖樂俱懷畝畝憂荆溪欲歸老浮玉偶

同游翫麟儀刑在驚呼歲月適回頭雜歌哭挽語
不成謳

次韻蘇伯固遊蜀岡送李孝博奉使嶺表

新苗未沒鶴老葉方翳蟬綠渠浸麻水白板燒松
煙笑窺有紅頰醉卧皆華顛家家機杼鳴樹樹梨
棗懸野無佩犢子府有騎鶴仙觀風嶠南使出相
山東賢渡江弔狠石過嶺酌貪泉與君步徙倚望
彼脩連娟願及南枝謝早隨北鴈翩歸來春酒熟
共看山櫻然

送晁美叔

我年二十無朋儔當時四海一子由君來扣門如
有求頽然病鶴清而脩醉翁遣我從子游翁如退
之蹈軻丘尚欲放予出一頭嘉祐初軾與子由寓
典國浴室美叔忽見
訪云君從歐陽公游久矣公令我來與子定
交謂子必名世老夫亦須放他出一頭地酒醒
夢斷四十秋病鶴不病骨愈蚪惟有我顏老可羞
醉翁賓客散九州幾人白髮還相收我如懷祖拙
自謀正作尚書已過優君求會稽實良籌往看萬
壑爭交流君近乞
越州

王文王挽詞

才名誰似廣文寒月斧雲丹琢肺肝玄晏一生都

卧病子雲三世不遷官幽蘭空覺香風在宿草何
曾淚葉乾猶喜諸郎有曹志文章還復富波瀾

送芝上人游廬山

二年閱三州我老不自惜團團如磨牛步步踏陳
迹豈知世外人長與魚鳥逸老芝如雲月炯炯時
一出北年三見之常若有所適逝將走廬阜計闊
道愈密吾生如寄耳出處誰能必江南千萬峰何
處訪子室

送程德林赴真州

君爲縣令元豐中吏貪功利以病農君欲言之路

無從移書諫臣以自通諫臣蹇受之也元豐天子為改容

我時疋馬江西東問之逆旅言頗同老人愛君如

劉寵小兒敬君如魯恭爾來明日達四聰收拾駟

駿冀北空君為赤令有古風政聲直入明光宮天

廐如海養群龍并收其子豈不公君之子祁舉制策文學行義為

時所稱白沙何必煩此翁

谷林堂詩

深谷下窈窕高林合扶踈美哉新堂成及此秋風

初我來適過雨物至如娛予稗竹真可人霜節已

專車老愧苦無賴風花吹填渠山鴉爭呼號谿蟬

獨清虛寄懷勞生外得句幽夢餘古今正自同

月何必書

予少年頗知種松手植數萬株皆中梁柱矣

都梁山中見杜輿秀才求學其法戲贈二首

露宿泥行草棘中十年春雨養髯龍如今尺五城

南杜欲問東坡學種松

君方掃雪收松子我已開榛得伏苓為問何如插

楊柳明年飛絮作浮萍

行宿泗間見徐州張天驥次舊韻

二年二躡過淮舟款段還逢馬少游無事不妨長

好飲著書自要且窮愁孤松早偃元非病倦鳥雖
還豈是休更欲河邊幾來往祇今霜雪已蒙頭

次韻劉景文贈傅曦秀才

窈眇文章宜和寡崢嶸肝肺亦交難未能飛瓦彈
清角肯便投泥戲潑寒忽見秋風吹洛水遙知霜
葉滿長安詩成送與劉夫子莫遣孫郎帳下看

在彭城日與定國爲九日黃樓之會今復以
是日相遇于床凡十五年憂樂出處有不可
勝言者而定國學道有得百念灰冷而顏益
壯顧予衰病心形俱瘁感之作詩

菊。殘。萸。囊。自。古。傳。長。房。寧。復。是。臞。仙。應。從。宋。武。橫。
刀。日。數。到。劉。公。戲。馬。年。對。玉。山。人。雖。老。矣。見。恒。河。
性。故。依。然。王。郎。九。日。詩。十。首。今。賦。黃。樓。第。二。篇。

九日次定國韻

朝菌無晦朔蟪蛄疑春秋南柯已一世我眠未轉
頭仙人視吾曹何異蜂蟻稠不知蠻觸氏自有兩
國憂我觀去來今未始一念留奔馳竟何得而起
無窮羞王郎誤涉世屢獻久不醅黃金散行樂清
詩出窮愁俛仰四十年始知此生浮軒裳陳道路
徃徃兒童收封侯起大第或是君家騶似聞負販

東坡全集 卷之三十 十九
人中有第一流炯然徑寸珠藏此百結裘意行無
車馬倏忽略九州邂逅獨見之天與非人謀笑我
方醉夢衣冠戲沐猴力盡病騏驥伎窮老伶優北
山有雲根寸田自可耰會當無何鄉同作逍遙遊
歸來城郭是空有纍纍丘

召還至都門先寄子由

老身倦馬河堤未踏盡黃榆綠槐影荒雞號月未
三更客夢還家得俄頃歸老江湖無歲月未填溝
壑猶朝請黃門殿中奏事罷詔許來迎先出省已
飛青蓋在河梁定餉黃封無賜茗遠來無物可相

贈一味豐年說淮穎

次韻定國見寄

還朝如夢中雙闕眩金碧復穿鷓鷯行強寄麋鹿
迹勞生苦晝短展轉不能夕默坐數更鼓流水夜
自逆故人爲我謀此志何由畢越吟知聽否誰念
病莊馬時方請越

次韻蔣穎叔錢穆父從駕景靈宮二首

歸來病鶴記城闔舊踏松枝雨露新半白不羞垂
領髮軟紅猶戀屬車塵雨收九陌豐登後日麗三
元下降辰粗識君王爲民意不才何以助精禋前

戲語有西湖風月不
如東華軟紅香土

與君竝直記初元白首還同入禁門
王殿齊班容
小語霜廷稽首泫微温
適與穆父竝拜庭中地皆流濕相與小語道之病
貪賜茗浮銅葉老怯香泉灑寶樽
回首鷓行有人
傑坐知羞虜是游魂

東坡全集第二十一卷

西蜀後學張養正校正

聶紹昌編刻

軾近以月石硯屏獻子功中書公復以涵星
硯獻純父侍講子功有詩純父未也復以月
石風林屏贈之謹和子功詩并求純父數句
紫潭出玄雲翳我潭中星獨有潭上月倒挂紫翠
屏我老不看書默坐養此昏花睛時時一開眼見
此雲月眼自明久知世界如泡影大小真偽何足
評笑彼三子歐蘇梅無事自作雪羽爭
事見三故人詩噍故
將屏硯送兩范要使珠璧栖牕櫺大范忽長謠語

出月脇令人驚

皇甫湜曰穿天心出月脅意外驚人語非尋常

小范當繼

之說破星心如雞鳴

孟郊聞雞詩云似問孤月口能說落星心

牀頭復

一月下有風林橫急送小范家護此涵星泓願從少陵博一句山木盡與洪濤傾

次韻范純父涵星硯月石風林屏詩

月次于房歷三星斗牛不神箕獨靈簸搖桑榆盡西靡影落蘇子硯與屏天工與我兩厭事孰居無事為此形與君持橐侍帷幄同到溫室觀堯瑩自憐太史牛馬走技等卜祝均倡伶欲留衣冠挂神武便擊雲水歸南溟陶泓不稱管城沐醉石可助

平泉醒故持二物與夫子欲使妙質留天庭但令滋液到枯槁勿遣光景生晦冥上書挂名豈待我獨立自可當雷霆我時醉眠風林下夜與漁火同青熒撫物懷人應獨歎作詩寄子誰當聽

次韻錢穆父會飲

彈冠恨不早挂冠常苦遲盛服每假寐角闕時伏思東門未祖道西山空拄頤逝將江海去安此麋鹿姿要當謀三徑何暇擇一枝與君幾合散得酒忘淳漓君談似落屑我飲如奕棋

世有作詩如奕棋奕棋如飲酒

飲酒乃天戒之語僕此二事皆不能

居官不任事造物真見私主人

獨賢勞金穀方流馳行人亦結束杖杜乃歸期公
卿雖少安河流正東醜我得會稽去方回良不癡
次韻穆父尚書侍祠郊丘瞻望天光退而相
慶引滿醉吟
千章杞梓陰雲天樗散誰收老鄭虔喜氣到君浮
白裏豐年及我挂冠前令嚴鍾鼓三更月野宿貌
貅萬竈烟大息何人知帝力歸來金帛看頰肩

郊祀慶成詩

帝出乘昌運天心予太平文章三代繼制作七年
成大祀乾坤合剛辰日月明泰壇朝掃地魄寶夜

垂精仰御圓蒼蓋環觀海嶽城北流吞朔易西極
落攬搶升燎靈光荅回鑿瑞霧迎需雲徧枯槁解
雨達勾萌可頌非天德因箴亦下情民言知有酌
帝謂本無聲富國由崇儉祈年在好生無心斯格
物克已自消兵化國安新政孤臣反舊耕還將清
廟什留與野人賡

次韻奉和錢穆父蔣穎叔王仲至詩四首見

和西湖月下聽琴

謾謾松下風藹藹壠上雲聊將竊比我不堪持寄
君半生寓軒冕一笑當琴尊良辰飲文字晤語無

由醺我有鳳鳴枝，背作蛇跗紋月明。委靜照心清，
得竒聞當呼王澗手。一洗羯鼓昏，請歌南風曲。猶
作虞書渾。家有雷琴甚竒古，王澗道人
雀閑妙於雅聲，當呼使彈。

見和仇池

上窮非想亦非非，下與風輪共一癡。翠羽若知牛
有角，空餅何必井之眉。還朝暫接鸚鵡翼，謝病行
收麋鹿姿。記取和詩三益友，他年弭節過仇池。

王津園

承平苑囿雜耕桑，六聖勤民計慮長。碧水東流還
舊派。王津分藥河上
流復合于下紫壇南峙表連岡，不逢遲日

鶯花亂空想踈林，雪月光千畝。何時躬帝藉，斜陽
寂歷瑣雲莊。

藉田

竊脂方紀瑞布穀，未催耕魚沫。依蘋渚，蝸涎上綵
楹。江湖來夢寐，簑笠負平生。琴裏思歸曲，因君一
再行。

頃年楊康功使高麗，還奏乞立海神廟板橋。
僕嫌其地湫隘，移書使遷之。文登因古廟而
新之，楊竟不從。不知定國何從見此書作詩，
稱道不已。僕不復記其云何也。次韻荅之。

退之仙人也遊戲於斯文談笑山偉奇鼓舞南海
神頃年三韓使幾為鮫鱈吞歸來築祠宇要使百
賈奔板橋商賈所聚我欲遷其廟下數浮空群謂登州移
書竟不從信非磊落人公胡為拳拳繫此空中雲
作詩頌其美何異刻劍痕我今已括囊象在六四
坤

沐浴啓聖僧舍與趙德麟邂逅

南山北澗兩非真東潁西湖迹已陳
李子來歸初可喜老聃新沐定非人
酒清不醉休休暖睡穩如禪
息息勻自笑塵勞餘一念明年同泛越溪春

次韻王仲至喜雪御筵

三軍喜氣鑠飛花睡起空驚月在沙
未集驕駟金腰褭故殘鳩鵲王橫斜
偶還仗內身如寄尚憶江南酒可賒
宣勸不多心自醉強扶衰白拜君嘉

僕所藏仇池石希代之寶也王晉卿以小詩
借觀意在於奪僕不敢不借然以此詩先之

海石來珠宮秀色如蛾綠坡陀尺寸間
宛轉陵巒

足連娟二華頂空洞三茅腹初疑仇池化
又恐瀛

洲蹙慙勤嶠南使餽餉淮東牧僕在揚州程德孺由嶺南解官以此

石見遺得之喜無寐與汝交不瀆盛以高麗盆藉以

文登王

僕以高麗所鑄大銅盆貯之又以登州海石如碎王者附其足

幽光先五

夜冷氣壓三伏老人生如寄衡茅久未卜一夫幸

可致千里還相逐風流貴公子竄謫武當谷見山

應已厭何事奪所欲欲留嗟趙弱寧許負秦曲傳

觀慎勿許間道歸更速

次天字韻苔岑巖起

一聲清蹕霧開天百辟心莊豈貌虔回顧驚君珠

玉側同升愧我糝糠前裴回月色留壇影縹緲松

香泛蠟煙

近制以林燭松明易林盆

莫歎郎潛生白髮聖朝求

舊鄙鳶肩

石塔寺

并引

世傳王播飯後鐘詩蓋揚州石塔寺事也相傳如

此戲作此詩

饑眼眩東西詩腸忘蚤晏雖知燈是火不悟鍾非

飯山僧異漂母但可供一莞胡為三百年記憶作

此訕齋厨養若人無益祗遺患乃知飯後鐘闌梨

蓋具眼

次韻蔣穎叔二首

扈從景靈宮

道人幽夢曉初還已覺笙簫下月壇風伯前驅清

東坡全集 卷之五
宿霧祝融驟乘破朝寒英姿連壁從多士妙句鏘
金和八鑾已向詞臣得頗牧時穎叔集除熙河帥路人莫作
老儒看

凝祥池

似知金馬客時夢碧雞坊冰雪消殘臘煙波寫故
鄉鳴鑾自容與立馬久回翔乞與三韓使新圖到
樂浪時高麗使在都下每至勝境輒圖畫以歸

和叔益畫馬次韻

天驥德力備馬外龍麟中皇天不遺言兀與圖畫
同駑駘飽官粟未受一洗空十駕均一至何事籛

雲風

王晉卿示詩欲奪海石錢穆父王仲至蔣穎
叔皆次韻穆至二公以為不可許獨穎叔不
然今日穎叔見訪親覩此石之妙遂悔前語
軾以謂晉卿豈可終閉不予者若能以韓幹
二散馬易之者蓋可許也復次前韻

相如有家山縹眇在眉綠誰云千里遠寄此一顰
足平生錦繡腸蚤歲藜藿腹從教四壁空未遣兩
峰蹙吾今况衰病義不忘樵牧逝將仇池石歸沂
岷山瀆守子不貪寶完我無瑕玉故人詩相戒妙

語予所伏一篇獨異論三占從兩卜君家畫可數
天驥紛相逐風駿掠原野電尾梢澗谷君如許相
易是亦我所欲今朝安西守來聽陽關曲勸我留
此峰他日來不速

軾欲以石易畫晉卿難之穆父欲兼取二物
穎叔欲焚畫碎石乃復次前韻并解三詩之
意

春冰無真堅露葉失故綠鷓疑鵬萬里竄笑夔一
足二豪爭攘袂先生一捧腹明鏡既無臺淨餅何
用蹙古蹴盆山不可隱畫馬無由牧聊將置庭宇

何必棄溝瀆焚寶真愛寶碎玉未忘玉久知公子
賢出語耆年伏欲觀博物妙故以求馬卜維摩既
復捨天女還相逐授之無盡燈照此久幽谷定心
無一物法樂勝五欲三峨吾鄉井萬里君部曲臥
雲行歸休破賊見神速晉卿將種
常有此志

生日蒙劉景文以古畫松鶴為壽且貺嘉篇
次韻為謝

問予一室間寧有千里廓塵心洗長松遠意癸孤
鶴生朝得此壽死籍疑可落微言在叅同妙契藏
九籥故人有竒趣逸想寄幽壑霜枝謝寒暑雲翮

無前却何須構明堂未羨巢阿閣緬懷別時語復
作數日惡詩腴固堪餐字瘦還可愕高標忽在眼
清夢了如昨君今會等伍志與湛輩各豈待相顧
言方爲不朽託子雲老執戟長孺終主爵吾當追
喬松子亦鄙衛霍

程德孺惠海中柏石兼辱佳篇輒復和謝

嵐薰瘴染却膚腴笑飲貪泉獨繼吳未欲連車收
惹苾肯教沉網取珊瑚不知庾嶺三年別收得曹
谿一滴無但指庭前雙柏石要予臨老識方壺

次秦少游韻贈姚安世

帝城如海欲尋難肯捨漁舟到杏壇剝啄扣君容
膝戶巍峩笑我切雲冠問羊獨怪初平在牧豕應
同德曜看肯把叅同較同異小窓相對爲研丹

次丹元姚先生韻

浮生知幾何僅熟一釜羹那於俯仰間用此委曲
情自憐無他腸偶亦得此生懸知當去客中有不
亡存但恐宿緣重每爲習氣昏似聞梅子真近在
吳市門未能肩拊洪但欲目擊溫不敢扣門呼恐
作踰垣奔且令紹介先徐以方便論不學劉更生
黃金鑄尚方不學房次律身事問潁陽王烈亦何

東坡全集 卷之三十一
人叔夜未可量獨見神山開遽餐石髓香至道尚
聽瑩麗材終蹶張先生喜而笑幅巾登我堂苦誓
指黃壤要言刻青琅蓬萊在何許弱水空相望且
當從嵇阮聊復數山王達人友四海曲士守一疆
慎勿使形謀兒童驚夜光

次韻秦少游王仲至元日立春三首

省事天公厭兩回新年春日併相催慙慙更下山
陰雪要與梅花作伴來

已卯嘉辰壽阿同願渠無過亦無功明年春日江

湖上回首觚稜一夢中

子田一字同叔元
日已卯渠本命也

詞鋒雖作楚騷寒德意還同漢詔寬好遣秦郎供

帖子盡驅春色入毫端

立春日翰林學
士供詩帖子

上元侍飲樓上三首呈同列

澹月踈星遶建章仙風吹下御爐香侍臣鵠立通
明觀一朶紅雲捧玉皇

薄雪初消野未耕賣薪買酒看升平吾君勤儉倡
優拙自是豐年有笑聲

老病行穿萬馬群九衢人散月紛紛歸來一點殘

燈在猶有傳柑遺細君

侍飲樓上則貴戚爭以黃
柑遺近臣謂之傳柑蓋尚

矣

東坡全集 卷之三十一
送蔣穎叔帥熙河 并引

穎叔出使臨洮，軾與穆父仲至同餞之。各賦詩一篇，以今我來思爲韻，致遄歸之意。軾得我字，西方猶宿師，論將不及我，苟無深入計，緩帶我亦可承明。正須君文字，粲藻火自薦。雖云數留行，終不果正坐。喜論兵臨老，付邊瑣。新詩出談笑，僚友困掀簸。我欲歌杖杜，楊柳方婀娜。邊風事首虜，所得蓋么麼。願爲魯連書，一射聊城筈。陰功在不殺，結草酬魏顆。

再送蔣穎叔帥熙河二首

使君九萬擊鵬鷗，肯爲陽關一斷魂。不用寬心九千里，安西都護國西門。
餘刃西屠橫海鯤，應予詩識是遊魂。歸來趁別陶洪景，看挂衣冠神虎門。

次韻穎叔觀燈

安西老守是禪僧，到處應然無盡燈。未夜出遊從萬騎，諸羌入看擁千層。便因行樂令投甲，不用防秋更打冰。振旅歸來還侍燕，十分宣勸恐難勝。

次韻王晉卿奉詔押高麗燕射

北苑傳呼陞楯郎，東夷初識令君香。天山自可三

東坡全集 卷之二十一
箭取海國何勞一葦航。宣勸不詞金盃側，醉歸爭看王鞭長。錦囊詩草勤收拾，莫遣雞林得夜光。

次韻錢穆父王仲至同賞田曹梅花

寒廳不知春，獨立耿玉雪。閉門愁永夜，置酒及明發。忽驚庭戶曉，未受煙雨沒。浮光風宛轉，照影水方折。鬢霜未易掃，眉斧真自伐。惟當此花前，醉卧黃昏月。

送襄陽從事李友諒歸錢塘

居杭積五歲，自意本杭人。故山歸無家，欲卜西湖隣。良田不難買，靜士誰當親。髯張既超然，老潛亦

絕倫。李子冰玉姿，文行兩清淳。歸從三人游，便足了此身。公堤不改昨，姥嶺行開新。幽夢隨子去，松花落衣巾。

次韻吳傳正枯木歌

天公水墨自奇絕，瘦竹枯松寫殘月。夢回踈影在東窓，驚怪霜枝連夜發。生成變壞一彈指，乃知造物初無物。古來畫師非俗士，妙想實與詩同出。龍眠居士本詩人，能使龍池飛霹靂。君雖不作丹青手，詩眼亦自工識拔。龍眠胸中有千駟，不獨畫肉兼畫骨。但當與作少陵詩，或自與君拈秃筆。東南

山水相招呼萬象入我摩尼珠盡將書畫散朋友
獨與長鋏歸來乎

送黃師是赴兩浙憲

世久無此士我晚得王孫寧非叔度家豈出次公
門白首沈下吏綠衣有公言哀哉吳越人久爲江
湖吞宮自倒帑廩飽不及黎元近聞海上港漸出
水底村願君五袴手招此半菽魂一見刺史天稍
忘獄吏尊會稽入吾手鏡湖小於盆比我東來時
無復瘡痍存

送范中濟經略侍郎分韻賦詩軾得先字且

贈以魚枕盃四馬箠一

梁李久樂禍自焚豈非天兩鼠鬪穴中一勝亦偶
然謀初要百慮善後乃萬全廟堂選世將范氏真
多賢仁風被宿麥綠浪搖秦川號令聳毛羽先聲
落虛弦我家天一方去路城西偏投竿困障日賣
劍行歸田贈君荆魚盃副以蜀馬鞭一醉可以起
毋令祖生先

書晁說之考牧圖後

我昔在田間但知羊與牛川平牛背穩如駕百斛
舟舟行無人岸自移我卧讀書牛不知前有百尾

羊聽我鞭聲如鼓鼙我鞭不妄發視其後者而鞭
之澤中草木長草長病牛羊尋山跨坑谷騰趨筋
骨強煙簑雨笠長林下老去而今空見畫世間馬
耳射東風悔不長作多牛翁

呂與叔學士挽詞

言中謀猷行中經關西人物數清英欲過叔度留
終日未識魯山空此生論議凋零三益友功名分
付二難兄老來尚有憂時歎此涕無從何處傾

丹元子示詩飄飄然有謫仙風氣吳傳正繼
作復次其韻

飛仙亦偶然脫命瞬息中惟詩不可擬如寫天日
容夢中哦七言王丹已入懷一語遭虐綽失身墮
蓬萊蓬萊至今空護短不養才上界足官府謫仙
應退休可憐吳與蘇骯髒雪滿頭雪滿頭終當却
與丹元子笑指東海乘桴浮

次王定國韻書丹元子寧極齋

仙人與吾輩寓迹同一塵何曾五漿餽但有爭席
人寧極無常居此齋自隨身人邪識郝鑒天不留
封倫誤落世網中俗物愁我神先生忽扣戶夜呼
祁孔賓便欲隨子去著書未絕麟願挂神虎冠往

卜飲馬鄰王郎濯統綺意與陋巷親南出苦不蚤
儻及蓴鱸新

王仲至侍郎見惠穉栝種之禮曹比垣下今
百餘日矣蔚然有生意喜而作詩

翠栝東南美近生神嶽陰惜哉不可致霜根絡雲
岑仙風振高標香實隕平林偶隨樗櫟生不爲樵
牧侵忽驚黃茅嶺稍出青玉鍼好事雖力取王城
少知音豈無換鵞手但知覓來禽高懷獨夫子一
見捐橐金得之喜不寐贈我意殊深公堂開後閣
凡本愧華簪栽培一寸根寄子百年心常恐樊籠

中催我鸞鶴襟誰知積雨後寒芒曉森森恨我迫
歸老不見汝十尋蒼皮護王骨旦莫視古今何人
風雨夜卧聽饑龍吟

次韻錢穆父馬上寄蔣穎叔二首

玉關不用一丸泥自有長城鳥鼠西剩與故人尋
土物臘糟紅麴寄馳蹄

多買黃封作洗泥使君來自隴山西高才得鬼人
人羨爭欲尋蹤覓舊蹄

表弟程德孺生日

仗下千官散紫庭時聞小語說蘇程長身自昔傳

甥舅壽骨遙知是弟兄

予與君皆壽骨真耳班列中多指予二人不問而知

其為中表也

曾活萬人寧望報

君在楚州予在杭州皆過飢歲活數萬人

求五畝却歸耕四朝遺老凋零盡鶴髮他年幾箇

迎

七年九月自廣陵召還復館于浴室東堂八

年六月乞會稽將去汶公乞詩乃復用前韻

乞郡三章字半斜廟堂傳笑眼昏花上人問我遲

留意待賜頭綱八餅茶

尚書學士得賜頭綱龍茶一斤八餅今年綱到最遲

夢遶吳山却月廊白梅盧橘覺猶香

杭州梵天寺有月廊數百

問寺中多白梅盧橘

會稽且作須臾意從此歸田策最良

東南此去幾時歸倦鳥孤雲豈有期斷送一生消

底物三年光景六篇詩

吳子野將出家贈以扇山枕屏

我我扇中山絕壁信天剖誰施大圓鏡衡霍入戶

牖得之老月師畫者一醉叟常疑若人胸自有雲

夢藪千巖在掌握用捨彈指久低昂不自知恨寄

兒女手短屏雖曲折高枕謝奔走出家非今日法

水洗無垢浮游雲釋嶠燕坐柳生肘忘懷紫翠間

相與到白首

東府雨中別子由

庭下梧桐樹三年三見汝前年適汝陰見汝鳴秋
雨去年秋雨時我自廣陵歸今年中山去白首歸
無期客去莫歎息主人亦是客對床定悠悠夜雨
空蕭瑟起折梧桐枝贈汝千里行重來知健否莫
忘此時情

謝仲適坐上送王敏仲北使

衝風振河朔飛霧失太行相逢不相識下馬須眉
黃洗眼忽驚笑見此王節郎喜有賢主人共此燈
燭光聚散一夢中人北鴈南翔吾生如寄耳送老
天一方幸子遇明主陳經入西廂歸期不可緩倚

相宜在傍

書丹元子所示李太白真

天人幾何同一漚謫仙非謫乃其游麾斥八極隘
九以化爲兩鳥鳴相酬一鳴一止三千秋開元有
道爲少留縻之不可矧肯求西望太白橫峨岷眼
高四海空無人大見汾陽中令君小見天台坐忘
真生年不知高將軍手汗吾足乃敢瞋作詩一笑
君應聞

次韻曾仲錫承議食蜜漬生荔枝

代北寒蠶擣韭萍竒苞零落似晨星逢鹽久已成

枯腊得蜜猶應是薄刑欲就左慈求拄杖便隨李
白跨滄溟攀條與立新名字兒女稱呼恐不經俗

十八琅
荔支

大行太皇太后挽詞二首

至矣吾三后功高漢已還復推元祐冠蓋得未昭

全臣嘗於經筵論奏仁宗皇帝謚曰明孝若明而不仁則民畏而不愛仁而不明則民愛而不畏

今大行太皇太后亦兼此二德有作猶非聖無私

故天下思慕庶幾於仁宗也

乃是天侍臣談要道家法信家傳
宰相以下嘗於經筵論奏祖宗以來家法十餘事書於記注

却狄安諸夏先王社稷臣固應祠百世何止活千

人定策天知我忘家帝念親萬方何以報得疾為

勤民

再和魯仲錫荔支

柳花著水萬浮萍荔實周天兩歲星柳至易成飛絮落水

宿仰為浮萍荔支至難本自玉肌非鵠浴至今丹

長二十四五年乃實殼似猩刑侍郎賦詠窮三峽妃子煙塵動四溟莫

遣詩人說功過且隨香草附騷經

次韻滕大夫三首

雪浪石

太行西來萬馬屯勢與岱嶽爭雄尊飛狐上黨天

下春半掩落日先黃昏削成山東二百郡氣壓代
北三家村千峯右卷蠹牙帳崩崖鑿斷開土門竭
來城下作飛石一礮驚落天驕魂承平百年烽燧
冷此物僵卧枯榆根畫師爭摹雪浪勢天工不見
雷斧痕離堆四面繞江水坐無蜀士誰與論老翁
兒戲作飛雨把酒坐看珠跳盆此身自幻孰非夢
故園山水聊心存

同前

我頃三章乞越州欲尋萬壑看交流且憑造物開
山骨已見天吳出浪頭

石中似有海獸形狀

履道鑿池雖可

致王川卷地若爲收洛陽泉石今誰主莫學癡人
李與牛

沉香石

壁立孤峰倚硯長共疑沉水得頑蒼欲隨楚客紉
蘭佩誰信吳兒是木腸山下曾逢化松石玉中還
有辟邪香早知百和俱灰燼未信人言弱勝強

石芝詩

并引

予昔夢食石芝作詩記之今乃真得石芝於海上
子由和前詩見寄予頃在京師有鑿井得如小兒
手以獻者臂指皆具膚理若生予聞之隱者曰此

肉芝也與子由烹而食之追記其事復次前韻
土中一掌嬰兒新爪指良是肌骨勻見之怖走誰
敢食天賜我尔不及賓旌陽遠游同一許長史王
斧皆門戶我家韋布三百年祇有陰功不知數跪
陳八簋加六瑚化人視之真魂蘇肉芝烹熟石芝
老笑唾熊羆頓雕胡老蠶作蠶何時脫夢想至人
空激烈古來大藥不可求真契常如磁石鐵

鶴歎

園中有鶴馴可呼我欲呼之立坐隅鶴有難色側
睨予豈欲臆對如鵬乎我生如寄良畸孤三尺長

脛閣瘦軀俛啄少許便有餘何至以身爲子娛驅
之上堂立斯須投以餅餌視若無嗶然長鳴乃下
趨難進易退我不如

送曾仲錫通判如京師

邊城歲暮多風雪強壓春醪與君別王帳夜談霜
月苦鐵騎曉出冰河裂斷蓬飛葉卷黃沙祇有千
林鬢鬆花應爲王孫朝上國珠幢玉節與排衙左
援公孝右孟博我居其間嘯且諾僕夫爲我催歸
來要與北海春水爭先回

和錢穆父送別并求頓遞酒

次韻

聯鑣接武兩長身鷓鴣行中語笑親九子羨君門
戶壯八州憐我往來頻
佇聞東府開賓閣便乞西
湖洗塞塵更向青齊覓消息要知從事是何人

